

ADDA BILISUMMAA OROMOO

OROMO LIBERATION FRONT



جبهة تحرير اورومو

Gaafa: 08/11/2015

Date: _____

تاريخ

Lakk.: 15/stm-abo/2015

No.: _____

رقم

Sadaasni 9 Guyyaan Yaadannoo FDG

Gootota FDG Dargaggoota Oromoon Qabsiifame Irratti Wareegaman Bara-baraan Kan Itti Yaadannu.

(Ibsa Adda Bilisummaa Oromoo)

Qabsoon diddaa gabrummaa baroota dheeraaf Ummatni Oromoo gaggeessaa ture bifa caalaatti qindaawaa fi waalta'aa taheen guutuu Oromiyaa keessatti wal qabatee akka diriiru, warraaqsi mirga abbaa-biyyummaa ofii falmachuu Oromiyaa guutuutti waaltominaan akka gaggeeffamuuf, Kallachi Qabsoo Bilisummaa Oromoo (ABO) bifa haarawaadhaan waamicha qabsoo Ummata Oromoof dabarseen, Sadaasa 9, bara 2005 irraa eegalee Sabni Oromoo, addatti ammoo dargaggootnii fi barattootni Oromoo, goleelee Oromiyaa hunda keessatti, keessattuu, manneen barnootaa Sadarkaa ol'aanoo fi Sadarkaa lammaffaa keessaa mirga dimokiraasii, mirga abbaa-biyyummaa fi bilisummaa Ummata isaanii falmachuuf hiriira nagayaa bahuu fi bifa adda addaatiin sochii wal irraa hin citnee fi itti fufiinsa qabu gaggeessuudhaan wareegama ol'aanaa baasanii sirna bittaa alagaa kan Wayyaanee/EPRDF mormuudhaan gaaffii Oromoo addunyaatti mul'isan. Erga Sadaasa 9, bara 2005 dargaggootni Oromoo FDG bifa caalaatti qindaaween gurmaawanii jalqabaniis as bara irraa baratti Fincilli Diddaa Gabrummaa Oromiyaa guutuu keessatti finiinaa jira.

Keessumaa ammoo, Ebla bara 2011 Warraaqsi Qeerroo Bilisummaa Oromoo erga bifa Jaarmayaa Dargaggootaa haaraa qabatee finiinuu jalqabee kaasees guutuu Oromiyaa keessatti Qeerroon Oromoo (Barattootnii fi Dargaggootni) sab-boontotaa fi walii-galatti Ummatni Oromoo bal'aan wal ta'uudhaan FDG bifa adda addaatiin mootummaa gabroomfataa Wayyaanee irratti finiinsuudhaan gaaffiin isaanii kan Bilisummaa Oromoo fi Walabummaa Oromiyaa lubbuun itti bahe, dhiigni itti dhangala'e, lafeen itti caccabe, maatii fi qabeenyi itti manca'e fiixa bauun isaa kan hin hafne ta'uu hojii fi gootummaadhaan mirkaneessaa jiran. Dargaggootni Oromoo (Qeerroon) Yeroo ammaa kanatti sadarkaan bilchinaa, jaarmayaa, murannoo fi hamileen qabsoof qaban ummata qabsaawaniif biratti abdiid guddaa kan hore dha. Dargaggootnii fi barattootni Qeerroo fi Qarreen akkasumas sab-boontotni dallawa shira siyaasaa roga adda addaan diinni ijaare diiganii falmaa finiinsuudhaan humna Oromoon qabu diinaa fi firattis agarsiisaa jiru.

Sirni bulchiinsa Wayyaanee/EPRDF nagayaa fi dimokraasii, akkasumas, mirga sabootaa kabajuu diduudhaan roorroon ummatoota irraan gahu yeroo irraa gara yerootti hammaachaa dhufuu fi Ummattoota biyyattii cunqursaa fi hiyyummaa hiriyyaa hin qabneef saaxiluu irraan kan ka'e Fincila diddaa gabrummaa gaggeeffamaa jiru kana keessatti wareegamni qaqaaliin ummata keenyaan baafameera, har'as baafamaa jira. Dargaggootni, barattootnii fi sab-boontotni Oromoo hanga Bilisummaan Oromoo mirkanaawutti falmaan mirga abbaa-biyyummaa kun kan hin dhaabbatne ta'uu lubbuu isaanii bakka bu'aa hin qabne wareeganiis mirkaneessaa jiran. Bara 2014 keessa duula Oromummaa balleessuu diinni maqaa 'Master Plan' jedhuun Oromootti bane mormuudhaan wareegamni Ummatni Oromoo baase yaadannoo as dhihoo ti. Gootota ilmaan Oromoo qaroo, beekoo fi hubatoo, kanneen sadoo jireenya dhuunfaa ifii irra kan biyyaa fi ummata isaanii caalchifachuudhaan dhiiga dhangalaasanii, lafee cabsanii, lubbuu kennanii bilisummaa Oromoof aarsaa tahan bara baraan seenaan QBO isaan yaadata!

Bara kana (2015) Sadaasni 9 (November 9) Guyyaan Yaadannoo Fincila Diddaa Gabrummaa (FDG) Oromiyaa keessaa fi biyyoota alaa bakka sab-boontotni Oromoo argaman maratti haala how'aa fi onnataa ta'een qabsaawotaa fi ummata keenya FDG keessatti lubbuu isaanii qaalii saba isaaniif kennanii fi kanneen mana hidhaa keessatti dararamaa jiran, akkasumas, sababaa FDG kanaan kanneen qaamaa hir'atan mara yaadachuu, seenaa boonsaa isaan dalagan faarsuu fi galma gahiinsa kaayyoo wareegama isaanii sanaaf irbuu keenya haaromfachuudhaan yaadatamee fi kabajamee oola.

Carraa kanaan kan Ummata keenya yaadachiisnu, yeroo ammaa kanatti sirni bulchiinsa Wayyaanee/EPRDF qabeenya ummataa saamuutti dabalee Oromoo lafa isaa irraa buqqisee dachii Oromiyaa gurguruudhaan gochaan sanyi-duguuginsaa (Genocide) Saba Oromoo irraan gahaa jiru falmaa bilisummaa bifa gara garaatiin gaggeessaa jirru daran jabaannee akka finiinsinuuf kan xiiqii nutti bulchu akka tahe dha. Kana malees, mootummaan Wayyaanee rakkoo siyaasaa fi dinagdee isa qabee jiru, akkasumas, dhiittaa mirga dhala namaa irratti galmee fokkisaa kuufachaa waan dhufeef jecha, xurii faallatee jiru kana dhokfachuu fi haguuguuf jecha saboota biyyattii wal nyaachisee ololoota dharaa karaa basaasota isaa tolchee afanfaajjii uumuuf olii fi gadi wixxifataa jiraachuun beekamaa dha. Dhaabota qabsoo bilisummaa irra jiranii fi caalaatti ammoo ABO fi hooggana isaa irratti duula abdiin kutannaa banuudhaan qabsoo Oromoo waan duubatti harkisuu danda'u itti fakkaatee dhama'aa jira. Ummatni keenya akkuma kanaan duraa dammaqiinsa shira diinaa kana of irraa tiksaa qabsoo diddaa gabrummaa finiinsuun waajiba.

Walumaagalatti Ummatni keenya, addatti ammoo Dargaggootni Sabichaa haala siyaasaa Impaayera Itoophiyaa bososee kufaa jiru kana xumura itti gochuuf jecha qabsoon yeroo ammaa finiinee jiru roga hundaan akka jabaatuuf dirqama isaanii akka bahatan ABOn gadi jabeessee yaadachiisa. Ummatoota Cunqurfamoo fi kanneen mirga bilisummaa fi dimokiraasii dhugaaf dhaabbatan waliin qabsoo irratti wal tumsaa socho'uufis roga hundaan hojiin hojjetamu akka jajjabeeffamuu qabu kanuma waliin yaadachiisa.

Xumura irratti, ABO kabajaa Gootota Sabaaf qabnu mul'isuun dirqama lammii Oromoo hundaa ta'uu ummata Oromoof dhaamaa, Sadaasa 9 guyyaa FDG yaadachuu qofas osoo hin taane, karaa ittiin FDG caalaatti jabeessinu fi QBO finiinsinu irratti jabaannee akka hojjennuu fi galata jaallan keenya bilisummaaf kufanii bilisummaa sabaatiin mirkaneessuuf harka wal qabannee kaayyoo jaallan kufanii hojiitti hiikuuf akka bakka hundaa socho'amu ummata Oromoo hundaa dhaamna.

Injifannoo Ummata Oromoof !

Adda Bilisummaa Oromoo

Sadaasa 8, 2015